

- पेट्रोलियम पदार्था री कालाबाजारी अर जमाखोरी रोकण सारू राजस्थान समेत केई राज्यां मांय छापामारी अर औचक जांच करी जा रही है।
- सड़क परिवहन अर राजमार्ग मंत्रालय नेशनल हाई-वे नम्बर-48 रा जयपुर-किशनगढ़ खंड ने 6-लेन बणावण सारू 910 करोड़ 90 लाख रुपया मंजूर कीना।
- मुख्यमंत्री भजनलाल शर्मा कह्यो-सरकार प्रदेश ने स्वास्थ्य अर साफ-सफाई रा हलका मांय आखा देश मांय अगाड़ी बणावण सारू सगळा जरूरी जतन कर रही है।
- केंद्र सरकार लद्दाख रा सामाजिक कार्यकर्ता सोनम वांगचुक री राष्ट्रीय सुरक्षा कानून रा तैत हिरासत रद्द कीनी।

000

पेट्रोलियम अर प्राकृतिक गैस मंत्रालय री संयुक्त सचिव सुजाता शर्मा कह्यो है के पेट्रोलियम पदार्था री कालाबाजारी अर जमाखोरी रोकण मांय राज्य सरकारां रो खास काम है। आज नई दिल्ली मांय खबरनवीसां सागे बातचीत करता थकां वे कह्यो के कालाबाजारी रोकण सारू लगातार छापा मार्या जा रह्या है अर औचक जांच करी जा रही है। संयुक्त सचिव बतायो के राजस्थान समेत केई राज्यां मांय औचक जांच अर छापामारी करी ज्यी है।

000

जयपुर-अजमेर बीचे नेशनल हाई-वे नम्बर 48 रा जयपुर-किशनगढ़ खंड ने 6-लेन रो बणायो जावेला। ई सारू केंद्र सरकार 910 करोड़ 90 लाख रुपया मंजूर कीना है। सड़क परिवहन अर राजमार्ग मंत्री नितिन गडकरी आ जाणकारी दीनी। वे बतायो के करीब 90 किलोमीटर लंबा ई गेला माथे फलाईओवर अर सर्विस रोड़ ई बणायी जावेला। 6 लेन री सड़क बण्यां पाछे जयपुर-किशनगढ़ बीचे आवण-जावण मांय 2 री बजाए 1 घंटो ई लागेला। मुख्यमंत्री भजनलाल शर्मा ई सारू प्रधानमंत्री नरेन्द्र मोदी अर केंद्रीय मंत्री नितिन गडकरी रो आभार जतायो है। सोशल मीडिया रे ज़रिए धन्यवाद देता थकां मुख्यमंत्री कह्यो के ऐड़ी कोशिसां ऊं नुवो राजस्थान बणावण री दिशा मांय खास कदम उठाय जा रह्या है।

000

मुख्यमंत्री भजनलाल शर्मा कह्यो है के राज्य सरकार प्रदेश रा हर तबका अर आखिरी पायदान रा हर एक जणा रा विकास सारू पूरा मन ऊं काम कर रही है। वे आज जयपुर कने भांकरोटा मांय राख्यी ज्या अन्तर्राष्ट्रीय वैश्य महासम्मेलन मांय बोल रह्या हा। मुख्यमंत्री नौजवानां ऊं नौकरी देवण वाळा बणबा री अपील कीनी। वे कह्यो के सरकार चार लाख सरकारी अर छह लाख गैर-सरकारी नौकरियां देवण री जुबान पूरी कर रही है अर हाल ताई सवा लाख ऊं बत्ती नौकरियां दे दीरीजी है। मुख्यमंत्री कह्यो के 'राइजिंग राजस्थान' समिट रे ज़रिए राज्य मांय 35 लाख करोड़ रुपया रा निवेश प्रस्तावां माथे सहमति बणी ही, जिण ऊं स्थानीय स्तर माथे नौकरी-धंधा रा मौका बधेला। मुख्यमंत्री ज़ोर दे र कह्यो के राज्य सरकार पाणी-बिजली समेत हर हलका मांय विकास सारू विगतवार योजना बणा र काम कर रही है।

000

राजस्थान दिवस ई साल चैत महीना री उजाळी एकम् रे दिन 19 मार्च ने मनायो जावेला। ई सिलसिला मांय आज मुख्यमंत्री भजनलाल शर्मा जयपुर रा अल्बर्ट हॉल ऊं पूरा राज्य मांय स्वच्छता संकल्प अर जागरूकता कार्यक्रम री सरूआत कीनी। मुख्यमंत्री खुद श्रमदान कर र साफ-सफाई राखण रो संदेश दीनो। ई मौके वे कह्यो के राज्य सरकार प्रदेश ने साफ-सफाई अर स्वास्थ्य रा हलका मांय अगाड़ी राज्य बणावण री कोशिश कर रही है। मुख्यमंत्री ज़ोर दे र कह्यो के 'विकसित भारत 2047' रो सपनो घर, गलियां अर स्मारक एकदम साफ व्हेवण री सूरत मांय ई पूरो व्हे सकेला। श्री शर्मा कह्यो के प्रदेश प्रदेश रा करीब-करीब सगळा गांवां मांय खुला मांय शौच बंद व्हे जावण रो ऐलाण कर दियो ज्यो है अर राजस्थान 'स्वच्छता ही सेवा' अभियान मांय देश मांय अव्वल रह्यो है। एक और कार्यक्रम मांय मुख्यमंत्री जनता ने राजस्थान दिवस री शुभकामना देता थकां राज्य बणावण मांय सरदार वल्लभ भाई पटेल रा काम ने याद कीना।

000

केंद्र सरकार लद्दाख रा सामाजिक कार्यकर्ता सोनम वांगचुक री हिरासत तुरत रद्द करण रो फैसलो कीनो है। वांगचुक करीब 170 दिन ऊं जोधपुर री जेल मांय बंद हा। वां ने लारला साल 24 सितंबर ने लद्दाख प्रशासन पकड़ लीना हा। सरकार री ओर ऊं आज एक औपचारिक बयान जारी कर र कही ज्यो के ई फैसला रो खास मकसद लद्दाख मांय शांति, थरता अर आपसी विश्वास रो माहौल बणावणो है। सरकार साफ कीनो के लद्दाख हलका मांय चाल रह्या विरोध प्रदर्शनां ऊं वठे सैर-सपाटा, कारोबार अर विद्यार्थियां री भणार्ई-लिखाई माथे गलत असर पड़ रह्यो हो।

000

केंद्रीय संस्कृति अर पर्यटन मंत्री गजेन्द्र सिंह शेखावत कह्यो है के देश नुवी सांस्कृतिक जागृति रा दौर मांय दाखिल व्हे रह्यो है अर विरासत ने ओजू मान देवण सारू तैयार है। वे आज जोधपुर रा जय नारायण व्यास विश्वविद्यालय मांय राख्यी ज्यी 'भारत की विश्व विरासत: राजस्थान' प्रदर्शनी रा उद्घाटन जळसा मांय बोल रह्या हा। श्री शेखावत कह्यो के आज्ञादी पाछे रा कुछ बरसां मांय देश री संस्कृति अर रीति-रिवाज री अनदेखी करी ज्यी, पण अब भारत असली पिछाण ने मजबूत बणा रह्यो है। वे देश री जूनी पांडुलिपि परंपरा रो जिक्र करता थकां कह्यो के हजारों बरसां ऊं म्हाणा विद्वान ताड़पत्रां, भोजपत्रां अर रेशमी कपड़ां माथे ज्ञान ने संजोयो है। वे आं पांडुलिपियां ने भारत री अनमोल बौद्धिक निधि बतायो।

0000

डीग जिला रा किसानां ने राष्ट्रीय बागवानी मिशन रा तैत नुवी उद्यानिकी तकनीक अर प्रसंस्करण री सिखावण दी जा रही है। कुम्हेर रा कृषि विज्ञान केंद्र मांय राख्या जा रह्या ई कार्यक्रम मांय जिला रा 100 ऊं बत्ता प्रगतिशील किसान नुवा तरीका ऊं खेती-बाड़ी रा गुर सीख रह्या है। उद्यानिकी विभाग रा सहायक निदेशक पप्पू यादव बतायो के सिखावण रे दौरान किसानां ने बागवानी रा नुवा तरीकां सागे राज्य सरकार कानी ऊं किसानां रा भला सारू चलायी जा रही योजनावां री ई जाणकारी दी जा रही है।

000

सिरोही मांय जिला प्रशासन अर महिला अधिकारिता विभाग री ओर ऊं अमृता हाट मेळो लगायो जा रह्यो है। ग्रामीण विकास अर पंचायती राज राज्यमंत्री ओटाराम देवासी इण रो उद्घाटन कीनो। ई पाछे वे न्यारी-नयारी स्टॉलां कने जा र वठे दरसाव करी ज्यो सामान देख्या अर स्वयं सहायता समूहां री महिलावां सागे बातचीत कीनी।

000

पाली मांय जिला प्रशासन अर आयुर्वेद विभाग री ओर ऊं संभाग स्तर रो आरोग्य मेळो भर रह्यो है। 15 मार्च ताई चालण वाळा ई मेळा मांय आयुर्वेद, योग, यूनानी अर होम्योपैथी रा जाणकार मुफ्त राय, जांच अर दवाइयां दे रह्या है। प्रदर्शनी रे दौरान पंचकर्म, चमड़ी री बीमारियां अर प्रकृति परीक्षण समेत दवाई रा गुणां वाळा पौधां री खेती रा बारा मांय खास सत्र राख्या जा रह्या है। आरोग्य मेळा मांय मोटी तादाद मांय जनता ईलाज रो फायदो ले रही है। मेळा मांय आज सिंज्यां काळबेलिया अर भवई नाच सरीखा सांस्कृतिक कार्यक्रम राख्या जा रह्या है।

000

राज्य रा केई हलकां मांय बादळा व्हेवण ऊं पारो उतर्यो है। चूरू, अलवर अर पिलानी समेत केई ठौड़ां पारो चार डिग्री सेल्सियस ताई उतर ग्यो। लारला चौबीस घंटा मांय बाड़मेर मांय सब ऊं बत्तो 39 दशमलव 6 डिग्री सेल्सियस तापमान दर्ज करी ज्यो। मौसम विज्ञान केंद्र, जयपुर काल जयपुर, अजमेर अर भरतपुर संभाग रा जिलां समेत 18 ठौड़ा आंधी चालण अर छांटो छिडको व्हेवण रा आसार जताया है। कठे-कठे ओला पड़बा री शंका है। 19 ऊं 21 मार्च बीचे राज्य मांय आंधी चालण सागे बिरखा व्हेवण रा आसार है। मौसम महकमा रे मुजब आवता एक सप्ताह ताई प्रदेश मांय ऊंचो ऊं ऊंचो तापमान 40 डिग्री सेल्सियस ऊं नीचे रेहवेला।

0000